

't Herenhoentien



Beste kiender !

Wij willen jim vanzels aldereerst een hiel goed 1994 toeweensken! Now de kastboom opruimd is en de euliebollen op binnen, schient de zonne elke dag een hiel klein betien langer.

"Dan wo'n de daegen een haentree langer," zeggen ooldere Stellingwarvers wel. Daor hebben ze wel wat geliek in. Et is elke dag een hiel klein betien langer lochtig, niet meer as de stap van een haene.

In feberwaori kuj' dat al wat beter vernemen en in **meert** nog meer. Op 21 **juni** schient de zonne et langste, daorom wodt dat ok de langste dag nuumd. Nao 21 juni wo'n de daegen de hiel tied wat kotter. Dat gaot deur tot 21 december. Jim raoden et al, 21 december is de kotste dag van et jaor.

Jim hebben wel heurd dat sommige maonden in et Stellingwarfs wat eers nuumd wodden as in et Nederlaans. In et Stellingwarfs wodt de maond **maart** dijglicks **meert** nuumd, mar **juni** blift ok in et Stellingwarfs **juni**.

Hoe as now al die maonden in et Stellingwarfs hieten willen we jim in dit Herenhoentien graeg vertellen. Kiek daorveur mar es naor de drie inlegvellen. Daor staon alle twaelf maonden van et jaor in et Stellingwarfs op. Juf of meester moet ze mar es evenpies veurlezen. En dan moe'n jim mar es zeggen welke maonden in et Stellingwarfs krek zo klinken as in et Nederlaans en welke maonden niet.

Om de kelinder klaor te maeken, moej' de strepieslijnen op de inlegvellen deurknippen.

Maek vervolgens een gattien in de zwatte stippel bovenan de zes vellen, die aj' dan hebben. Aj' dat daon hebben moej' de zes vellen op de goeie

volgodder op mekeer leggen.

Deur een touwgien deur de gatties te doen is je kelinder klaor en kuj' him ophangen.


Ie kun vanzels de plaeties eerst ok nog mooi kleuren!

Op disse bladziende staot et spellegien "botter, keze en eier".

Dit spullegien doe' mit z'n tweejen. Ien van de twee zet een rontien in ien van de vierkaanties. Dan mag de ere.

Hi'j of zi'j zet een krusien in een aander vierkaantien. Dan mag de eerste weer. De winner van et spullegien is degene, die et eerste drie ronties of drie krusies op een riegeltien het.

Wij hopen daj'm een boel plezier van dit Herenhoentien hebben zullen. Tot de volgende keer.



't Herenhoentien is veural bedoeld veur groep 1 en 2 van et basisonderwies. Et verschient 3 à 4 keer in 't jaor.

Piepmoes op de slee

(Veurleesverhael van Sietske Bloemhoff)

Butendeure ligt een dik pak snij en et is roetkoold. Mar ja, wat wij' ok. Et is jannewaori, dus midden in de winter. Uut de schostien van Piepmoes zien kesteel kringelt rook. Piepmoes zit tegere mit zien drie vrunden bij de kachel neuties te doppen en op te eten. Weten jim nog wel wie zien drie vrunden binnen? Juust! Et bin de doeve, et roodbossien en de gele gouwe.

Aenlik zitten ze heur een betien te vervelen. Ze hebben al een hiele poos in huus zeten en spullegies daon. In 't laest kriej' daor wél een keertien je nocht of.

"'k Wol best even naor buten toe," zegt Piepmoes. "De hiele dag bij de kachel zitten vien 'k mar niks. 'k Zol best schaese-rieden willen, jim dan?"

"Ik ok wel," zegt de gele gouwe. "Mar et zal vandaege wel niks wodden, Piepmoes. Et het vannaacht ommeraek snij'd. De sloden bin hielendal mit snij' dichtewijd. Doe 'k hier naor toe vleug kon'k van de iesbaene ok niks meer zien. En overal liggen hoge snij'dunen." "Ja," kwettert et roodbossien, "die heb ik ok zien. An de raand van de bos, vlakbij de boerderi'je daor Klaos en Miep wonen, liggen een peer hiele hoge dunen. Et is mar goed da'k vliegen kan, eers wa'k hier vandaege nooit kommen!"

"Dat gelt veur mi'j ok," koerkt de doeve, "en ik bin nogal wat groter as een roodbossien."

"Dan kan ik et hielendal wel vergeten," vint Piepmoes. "Ik bin mar zo klein en vliegen kun moezen now ien keer niet. Dan durve ik ok niet mit mien slegien te speulen. Hè, wat jammer now toch. Dan moe'k mar in mien kesteel blieden tot et begint te dujjen. Dat kan wel meert wodden!"

Et liekt wel as zit de doeve diepe nao te daenken.

Dat is ok zo, want inienend zegt hi'j: "Mar ik bedaenke wat. We bienen een stok touw an Piepmoes zien slegien vaaste. Ik doe dat touw ok om mien vleugels henne. A'k dan niet te hoge vliege trek ik zo de slee mit Piepmoes d'r op over de snij'.


Ik bin ommes sterk genoeg!"

"Wat een goed idee, doeve," zegt Piepmoes. "Lao'we naor die hoge snij'dunen an de raand van de bos toe gaon. Dan lao'we oons om beurten op de slee naor beneden roetsen. Zuwwwe vot-en-daolik mar gaon, jonges?"

"As die aekelike katten mar niet in de buurt binnen," zegt de gele gouwe.

"Ae, wel nee je," mient Piepmoes. "Et is heur vusen te koold. Die mierkerds liggen vast in heur maantien bij de kachel te slaopen. Zit daor mar niet over in."

De voegels en Piepmoes doen de jasse an, een sjaal omme en de musse op. Ze pakken de slee uut de schure en bienen d'r een aende touw an. Dan dot de doeve et touw om de vleugels.



"Gao mar op de slee zitten, Piepmoes " roekoerkt hi'. "As jim now veuruut vliegen en et beste pad uutzuken, dan vlieg ik jim mit Piepmoes op de slee nao," zegt hi' tegen et roodbossien en de gele gouwe.

En daor gaon ze henne. Now en dan hobbelt de slee al es wat, mar Piepmoes hooft him mit beide hanen an weerskaanten van de slee goed vaaste. Et moesien glimkt d'r over, zo mooi vint hi' et.

Nao een posien zien ze de hoge sni'jdunen al. Ze vliegen mitien naor de hoogste daorvan toe.

"Dat gong mooi, niet Piepmoes?" poest de doeve. Hi' is toch wel een betien muui wodden.

" Prachtig ! Ik vun et prachtig, doeve," gefft de moes as antwoord. "En wat hebben jim een mooi pad uutzocht," zegt hi' tegen et roodbossien en de gele gouwe.

"Ja, en gien katte te zien," sjilpen de beide voegels.

Mar was dat mar waor...

De voegels en Piepmoes hebben de katten niet zien, mar de katten hebben Piepmoes en de voegels wél zien! Ze liggen aachter een sni'jdunegien naor de vier vrunden te loeren. "Lekker stokkien vleis daor op die slee, Klaos," mierkt Miep. "Doe now mar wat ik je zegd hebbe, dan zal ik jow es even zien laoten hoe aj' een moes pakken moeten. Mit jow wodt et toch nooit wat." Klaos kikt Miep gremietig an mar besluit toch mar te doen wat Miep zegt.

De beide katten sloepen elk een kaant uut. Van Miep is haost niks te zien, die is ommes krek lieke wit as de sni'. Mar Klaos vaalt wél op.

"Oe heden, daor hej' Klaos de kaeter," schrikt et roodbossien. "Mar hi' lopt van oons of. Zol hi' oons niet zien hebben, of het hi' et lief. al rond? Now ja, gelokkig hoeven we now nargens over in te zitten."

Dan gaot et roodbossien weer mit helpen et slegien zo te zetten, dat Piepmoes, die an de beurt is, weer naor beneden glieden kan. Intied is Miep aorig dichte in de buurt kommen. "Die koekebakkers hebben mi' niet zien," daenkt de katte, "Klaos het ze mooi veur et lappien hullen. Dat vaalt me niks van die kaeter of. As ze Piepmoes zo mitien een douwgien geven stap ik nog een hiel klein aentien naor veuren. Op dat raantien sni' daore kan'k me mooi ofzetten en dan he'k Piepmoes mit iene geweldige sprong te pakken!"

Veurzichtig schoefelt Miep nog een stokkien veuruut as Piepmoes op de slee stapt en naor beneden glieden zal. Miep wiebelt wat mit de veurpoties henne-weer en zal him ofzetten veur de sprong. En dan gebeurt et...

In plak van omhogens te springen, zakt Miep in ien keer een hiel aende naor beneden. Op de kop in een sloot.



Want juist op et plak daor Miep him nog es extra ofzetten zol zit een sloot. De sloot die om et hiem van de boerderij lopt. En die sloot is krek as de ere sloden in de bos en de iesbaene hielendal dichtewijd mit snij. En dat had Miep niet in de gaten. Allierend de stat stikt nog boven de snij uut en raosen dat die katte dot za'k jim vertellen!

"Klaos, Klaos, help, help! Help me toch. Douk stik ik nog, kom mi'j toch gauw redden, Klaos. Help, help..."

Gelukkig heurt Klaos Miep en lopt zo hadde as hi'j kan naor Miep toe. Et laeste stokkien dot hi'j hiel veurzichtig. Klaos wil niet graeg ok op 'e kop in de sloot valen. Nog een klein stappien en

dan kan hi'j Miep krék bi'j et zwatte tippien van de stat griepen.


Daor begint hi'j uut alle macht an te trekken. Miep raost now nog vule hadder, dat zui'm begriepen. Et dot een katte now ien keer ommeraek zeer aj'm an de stat trekken, mar ja...

As Miep eindelijk uut de sloot is maeken de beide katten dat ze thuis kommen. En foeteren en krimmeneren dat ze doen!

Niet mooi meer. En de vier kammeraoden?

Die lachen heur haost kroem vanzels. Ze speulen nog een hiel posien deur mit de slee, want van Klaos en Miep hebben ze vandaeg gien last meer!

Kleurplaete



't Herenhoentien wodt uitgeven deur de Intergemientelike Begeleidingsgroep Hiemkunde in Oost- en West-Stellingwarf

An dit Herenhoentien warkten Jan de Vries, Bart Beltman, Saskia Douma en Sietske Bloemhoff mit.

Jannewaori



Maendag	3	10	17	24	31
Deensdag	4	11	18	25	
Woensdag	5	12	19	26	
Donderdag	6	13	20	27	
Vri'jdag	7	14	21	28	
Zaoterdag	1	8	15	22	29
Zundag	2	9	16	23	30

Feberwaori



Veurjaorsvekaansie 28 feberwaori t/m 4 meert

Maendag	7	14	21	28
Deensdag	1	8	15	22
Woensdag	2	9	16	23
Donderdag	3	10	17	24
Vri'jdag	4	11	18	25
Zaoterdag	5	12	19	26
Zundag	6	13	20	27


Maendag	4	11	18	25	
Deensdag	5	12	19	26	
Woensdag	6	13	20	27	
Donderdag	7	14	21	28	
Vri'jdag	1	8	15	22	29
Zaoterdag	2	9	16	23	30
Zundag	3	10	17	24	

Maendag	7	14	21	28	
Deensdag	1	8	15	22	29
Woensdag	2	9	16	23	30
Donderdag	3	10	17	24	31
Vri'jdag	4	11	18	25	
Zaoterdag	5	12	19	26	
Zundag	6	13	20	27	



Paosvekaansie 1 t/m 4 april
Keuninginnedag 30 april


April



Meert


Meie

Bevri'jdingsdag 5 meie
 Meivekaansie 6 t/m 13 meie
 Pinkstervekaansie 23 meie



Maendag	2	9	16	23	30
Deensdag	3	10	17	24	31
Woensdag	4	11	18	25	
Donderdag	5	12	19	26	
Vri'jdag	6	13	20	27	
Zaoterdag	7	14	21	28	
Zundag	1	8	15	22	29

Juni




Maendag	6	13	20	27	
Deensdag	7	14	21	28	
Woensdag	1	8	15	22	29
Donderdag	2	9	16	23	30
Vri'jdag	3	10	17	24	
Zaoterdag	4	11	18	25	
Zundag	5	12	19	26	

Maendag	1	8	15	22	29
Deensdag	2	9	16	23	30
Woensdag	3	10	17	24	31
Donderdag	4	11	18	25	
Vri'jdag	5	12	19	26	
Zaoterdag	6	13	20	27	
Zundag	7	14	21	28	


Maendag	4	11	18	25	
Deensdag	5	12	19	26	
Woensdag	6	13	20	27	
Donderdag	7	14	21	28	
Vri'jdag	1	8	15	22	28
Zaoterdag	2	9	16	23	30
Zundag	3	10	17	24	31

Zommervekaansie 25 juli t/m 2 september



Augustus

Juli



B.G.H. in Oost- en West-stellingwart

September



Maendag	5	12	19	26	
Deensdag	6	13	20	27	
Woensdag	7	14	21	28	
Donderdag	1	8	15	22	29
Vri'jdag	2	9	16	23	30
Zaoterdag	3	10	17	24	
Zundag	4	11	18	25	

Oktober



Maendag	3	10	17	24	31
Deensdag	4	11	18	25	
Woensdag	5	12	19	26	
Donderdag	6	13	20	27	
Vri'jdag	7	14	21	28	
Zaoterdag	1	8	15	22	29
Zundag	2	9	16	23	30

Maendag	5	12	19	26	
Deensdag	6	13	20	27	
Woensdag	7	14	21	28	
Donderdag	1	8	15	22	29
Vri'jdag	2	9	16	23	30
Zaoterdag	3	10	17	24	31
Zundag	4	11	18	25	



Kastdaegen
25, 26 december

December

Maendag	7	14	21	28	
Deensdag	1	8	15	22	29
Woensdag	2	9	16	23	30
Donderdag	3	10	17	24	
Vri'jdag	4	11	18	25	
Zaoterdag	5	12	19	26	
Zundag	6	13	20	27	



11 november
Sunte Matten

November